

Relatóriu hosi Sekretáriu-Jerál kona-ba Misaun Integrada Nasoins Unidas nian iha Timor-Leste (ba períodu entre 21 Setembru 2010 no 7 Janeiru 2011)

I. Introdusaun

1. Relatóriu ida-ne'e submete tuir Konsellu Seguransa nia rezolusaun 1912 (2010), ho ida-ne'e Konsellu hanaruk tan mandatu Misaun Integrada Nasoins Unidas nian iha Timor-Leste (UNMIT) ba 26 Feveireiru 2011. Relatóriu ne'e ko'alia kona-ba dezenvolvimentu prinsipál sira iha Timor-Leste no oinsá mak Misaun hala'o ninia mandatu hosi 20 Setembru 2010. Ha'u-nia Representante Espesiál, Ameerah Haq, lidera nafatin Misaun ne'e no koordena ho atór sira hosi sistema Nasoins Unidas nian no ho parte interesadu sira seluk. Nia hetan apoiu hosi Finn Reske-Nielsen, Sekretáriu-Jerál nia Representante Espesiál Adjuntu kona-ba Apoiu ba Governasaun, Dezenvolvimentu no Koordenasaun Umanitária, no Shigeru Mochida, Sekretáriu-Jerál nia Representante Espesiál Adjuntu kona-ba Apoiu ba Setór Seguransa no Estado de Direito. UNMIT kontinua nafatin ninia abordajen "Nasoins Unidas nia sistema ida", ne'ebé konsistente ho ninia kadru estratéjiku integradu.

II. Dezenvolvimentu polítiku no seguransa hosi Setembru 2010 to'o ohin

2. Situausaun jerál iha Timor-Leste hakmatek durante períodu relatóriu ne'e nian, ho tendénsia jerál ida ne'ebé hatudu katak dame, estabilidade no dezenvolvimentu ba tempu naruk hetan progresu boot. Vontade atu kaer metin dame, estabilidade no unidade reflète iha mensajen Tinan Foun hosi líder polítiku nasionál oinoin. Iha ninia diskursu iha 31 Dezembru 2010, Prezidente Timor-Leste, José Ramos-Horta, hateten katak importante promove unidade nasionál no diálogu no fó kréditu ba esforsu kombinadu hosi ninia Gabinete, Governu, partidu polítiku sira, inklui líder sira hosi Frente Revolucionária do Timor-Leste Independente (Fretilin), forsa seguransa sira, sosiedade sivil, Uma Kreda Katólka, parseiru bilaterál no multilaterál sira, Nasoins Unidas no forsa seguransa internasionál, no seluk tan, kona-ba progresu vizível ne'ebé hetan hahú hosi 2006 to'o ohin. Iha 3 Janeiru, Sekretáriu Estadu ba Konsellu-Ministru hasai komunikadu imprensa ida hodi subliña katak Governu sei mobiliza rekursus atu garante dame, kreximentu no prosperidade iha Timor-Leste ba jersaun sira oin mai. Iha ninia mensajen iha 15 Dezembru, Sekretáriu-Jerál Fretilin nian, Mari Alkatiri, halo apelu ba Timoroan hotu-hotu atu hamutuk hodi defende prinsipiu sira Konstituisaun nian no estado de direito demokrátiku no atu rejeita violénsia nu'udar forma atu hetan podér polítiku; nia halo mós apelu katak tinan 2011 sai hanesan tinan ida atu harii konfiansa entre Timoroan hotu-hotu no solidariedade nasionál.

3. Liu tiha konsulta públika kona-ba projetu Planu Dezenvolvimentu Estratéjiku Nasionál ne'ebé Primeiru-Ministru Kay Rala Xanana Gusmão hala'o iha inísiu 2010, iha subdistritu hotu-hotu, ne'ebé kobre períodu 2011 to'o 2030 (haree S/2010/522, parágrafu 3), projetu ne'e sei dauk ramata. Maibé, bainhira Governu apresenta proposta Orsamentu Estadu 2011 ba Parlamentu Nasionál atu aprova, nia tau iha konsiderasaun Planu ne'e. Durante audiénsia iha komisaun parlamentár, iha fulan Novembru no Dezembru, membru Governu sira esprika despeza Estadu nian no programa sira ne'ebé implementa iha 2010 no defende rúbrika sira iha proposta orsamentál ba 2011. Reflete preokupasaun oinoin hosi públiku nia persesaun katak osan estadu gasta saugati no korrupsaun aumenta daudaun, membru Parlamentu sira foti kestaun kona-ba projetu boot balu ho fundus estadu nian, hanesan konstrusaun sentráel elétrika foun ida no rede nasionál eletrisidade ne'ebé la'o daudaun, no foti alegasaun kona-ba fundu estadu ne'ebé uza la loos, inklui sosa kareta, mina-rai no foos. Membru Parlamentu balu foti mós preokupasaun kona-ba proposta Governu nian atu harii fundu ida ba infraestruturá hodi halo jestaun ba *um terço* (1/3) Orsamentu Jerál, ne'ebé bele tranzita hosi tinan ida ba tinan seluk no bele fahe la prezisa aprovasaun hosi Parlamentu.

4. Governu nia inisiativa importante ida mak sorumutu ne'ebé hala'o hosi 27 to'o 29 Dezembru iha Dili ho Xefe Suku (aldeia) 442, ne'ebé Ministru Administrasaun Estatál no Ordenamentu Territoriál mak loke no taka. Sorumutu ne'e fó oportunidade ba Governu no Xefe Suku sira atu diskuti kona-na planu dezentovimentu Governu nian ba 2011, liliu iha área edukasaun no agrikultura.

5. Polísia nasionál simu hikas responsabilidade prinsipál hodi hala'o operasaun polisiál iha tan distritu rua no unidade tolu, ho ida-ne'e, sira kaer ona distritu sanulu no unidade neen to'o ohin loron. Biar hakmatek jerál ne'ebé rejista durante períodu relatóriu ne'e nian, akontese insidente violentu lubuk ida entre grupu joven sira. Insidente grave liu akontese iha 16 Dezembru iha Distritu Ermera, ne'ebé ema ida mate, rua hetan kanek no uma ruanulu resin haat naksobu. Iha violénsia ida seluk, iha Distritu Baucau, entre 12 to'o 3 Janeiru, ne'ebé envolve luta entre grupu arte marsiál sira, ema na'in tolu mate. Maski insidente hirak ne'e kria preokupasaun, sira mosu hanesan rezultadu hosi disputa lokál no laiha impaktu boot ba situasaun seguransa jerál.

6. Relasaun bilaterál entre Indonézia no Timor-Leste maka'as nafatin. Primeiru-Ministru Gusmão no Presidente Susilo Bambang Yudhoyono hala'o sorumutu bilaterál iha Forum Demokrasia iha Bali, entre 10 no 11 Dezembru. Iha Forum ne'e, Indonézia manifesta nia vontade katak durante ninia prezidénsia iha 2011 nia sei fó tulun ba Timor-Leste nia vontade atu sai nu'udar membru Associação de Nações do Sudeste Asiático.

A. Apoiu ba diálogu no rekonsiliaun

7. Ha'u-nia Representante Espesiál kontinua uza ninia *bons officios* iha sorumutu regulár ho Presidente Ramos-Horta, Primeiru-Ministru, Presidente Parlamentu Nasionál Fernando "Lasama" de Araújo no Sekretáriu-Jerál Fretilin nian. Nia kontinua hala'o mós sorumutu ho representante hosi partidu polítiku hotu-hotu, inklui partidu hirak ne'ebé laiha representasaun parlamentár, no mós ho representante hosi feto sira-nia partidu polítiku. Ha'u-nia Representante Espesiál Adjuntu kona-ba Apoiu ba Governasaun, Dezentovimentu no Koordinasaun Umanitária kontinua hala'o sorumutu regulár ho Visi Primeiru-Ministru hodi ko'alia kona-ba asuntu sira ne'ebé iha relasaun ho responsabilizasaun no governasaun, seguransa ai-han nian, programa alimentasaun eskolár no preparasaun kona-ba risku dezastre nian. Ha'u-nia Representante Espesiál Adjuntu kona-ba Apoiu ba Setór Seguransa no Estado de Direito kontinua hala'o sorumutu ho Sekretáriu Estadu Seguransa no Defeza hodi ko'alia kona-ba polisiamentu no asuntu sira setór seguransa nian iha fronteira, ho atensaun liuliu ba prosesu sertifikasaun ba polísia nasionál, retomada responsabilidade polisiamentu ba polísia nasionál, ne'ebé hala'o daudaun, no medidas ne'ebé prezisa foti atu bele mantein seguransa no estabilidade durante períodu **krusiál** eleisaun nian iha 2012.

8. Iha 21 Setembru, hafoin halo tiha konsulta jerál ho instituisaun sira seluk hosi Estadu, sosiedade sivil, lider relijiozu sira no vítima sira-nia organizasaun, Parlamentu hahú halo deliberasaun iha plenária ba proposta-lei kona-ba reparasaun no kona-ba instituisaun ne'ebé atu tuir Comissão de Acolhimento, Verdade e Reconciliação no Comissão de Verdade e Amizade (hatee S/2010/85, parágrafo 76). Debate ne'e refleto opiniaun oinoin - se instituisaun ne'e atu sai autónomu ka atu sai hanesan organizmu Governu nian - no kona-ba definisaun vítima nian. Iha 29 Setembru Parlamentu adia ba fulan Fevereiro 2011 kualkér debate adisionál kona-ba proposta-lei sira, tuir mosaun ida hosi membru Parlamentu na'in sanulu resin rua (ne'ebé representa partidu sira iha Governu nia laran no nia li'ur) ne'ebé husu atu diskuti lejislasaun ne'ebé iha kona-ba veteranu molok atu halo tan konsiderasaun ba proposta-lei sira. Iha kontestu ida-ne'e, membru Parlamentu lubuk ida defende katak asuntu balu - hanesan sé mak iha direitu atu sai veteranu no subsidiu ka rekoñesimentu sá mak tenke fó ba veteranu sira - prezisa define didi'ak molok atu rezolve kestaun kona-ba reparasaun ba vítima sira.

9. Ho apoiu hosi Presidente, konferénsia finál kona-ba diálogu konsensu nasionál kona-ba lia-loos, justisa no rekonsiliaun hala'o entre 21-23 Outubru, ne'ebé Presidente Parlamentu Nasionál hamutuk ho Enviadu Espesiál Noruega, Bispu Gunnar Stålsett, mak prezide. Konferénsia ne'e fasilita diálogu entre Governu, membru Parlamentu sira no lider Timoroan sira kona-ba kestaun justisa no rekonsiliaun. Sesaun abertura halibur Presidente, Presidente Parlamentu Nasionál, Primeiru-Ministru no Sekretáriu-Jerál Fretilin. Kestaun sira ne'ebé diskuti inklui tratamentu ne'ebé fó ba kazu Maternus Bere (hatee S/2009/504, parágrafo 33), reparasaun ba vítima violasaun direitus umanus entre 1974 no 1999, no prosesu judisiál ba krime grave ne'ebé komete iha 1999. Presidente Ramos-Horta ko'alia kona-ba relasaun bilaterál di'ak ho Indonézia no subliña katak justisa tenke tau iha konsiderasaun situasaun partikulár Timor-Leste nian no tenke tetu elementu punisaun no rekuperasaun nian. Asuntu hirak ne'ebé diskuti inklui tratamentu ba kazu Maternus Bere (hatee S/2009/504, parágrafo 33), reparasaun ba vítima sira hosi violasaun direitus umanus entre 1974-1999 no prosesu judisiál

kona-ba krime grave ne'ebé komete iha 1999. Primeiru-Ministru, bainhira refere ba situasaun estabilidade ohin loron nian, nia hateten katak instabilidade no violénsia la mosu de'it hosi problema justisa formál maibé mosu mós hosi falta justisa sosiál. Diálogu kona-ba konsensu nasionál, ne'ebé hahú iha 2009, hala'o hosi komisaun nasionál ne'ebé halo parte partidu polítiku hotu-hotu, ho asisténsia hosi NGO sira, Uma Kreda Katólíka, Gabinete Altu Komisáriu ONU nian ba Direitus Umanus (OHCHR) no UNMIT.

10. Iha 24 Novembru, ha'u-nia Representante Espesiál, ho apoiu hosi Programa Nasoins Unidas nian ba Dezenvolvimentu (United Nations Development Programme (UNDP)) no Fundu Nasoins Unidas nian ba Feto (UNIFEM, agora halo parte UN-Feto), hala'o sorumutu ida ka *mesa-redonda* ho representante sira hosi sociedade sivil nia organizasaun feto, hanesan parte atividade komemorativa hodi marka Rezolusaun 1325 nia tinan sanulu (2000) (hatee S/2010/522, parágrafo 11). Sorumutu ne'e laran-ksolok ho promulgasaun ba lei hasoru violénsia doméstika no medidas akompañamentu ba lei ne'e, inklui medidas ba ninia implementasaun, no afirma dala ida tan katak importante haka'as nafatin hodi hametin feto sira-nia direitu atu hana'in rai no hasa'e sira-nia partisipasaun iha prosesu polítiku. Ha'u nia Representante Espesiál ko'alia mós iha sorumutu ne'e kona-ba lansamentu ba relatóriu kona-ba prosesu aprendizajen kruzada hosi Irlanda/Irlanda Norte, Timor-Leste no Libéria kona-ba Rezolusaun 1325 (2000) iha 25 Outubru iha New York, ne'ebé kulmina inisiativa tinan tolu entre nasaun hirak ne'e. Iha 9 Dezembru, Parlamentu Foin Sa'e, hala'o iha Dili ninia sesaun ba dala uluk, ne'ebé Sekretáriu Estadu ba Juventude no Desportu mak inaugura no Prezidente Parlamentu Nasionál ko'alia ba delegadu na'in atus ida tolunulu. Sekretáriu Estadu nia inisiativa ida-ne'e simu nafatin apoiu hosi Fundu Nasoins Unidas ba Labarik (United Nations Children's Fund (UNICEF)).

11. Ho apoiu hosi UNDP, Ministru Solidariedade Sosiál inaugura edificiu ba Departamentu Konstrusaun Pás no Koezaun Sosiál, iha 10 Dezembru, Loron Direitus Umanus. Departamentu ne'e nia objetivu mak atu buka hametin kapasidade kona-ba prevensaun hasoru konfliktu, kriaun pás no koezaun sosiál iha nivel nasionál no komunitáriu, promove aumentu partisipasaun hosi feto sira iha inisiativa sira kona-ba harii dame, no integra prosesu dezenvolvimentu sira ne'ebé sensitivu ba impaktu konfliktu nian.

B. Hadia governasaun demokrátika

12. Iha 29 Novembru, Konsellu-Ministru aprova alterasaun ba lejislasaun kona-ba eleisaun prezidensiál, eleisaun parlamentár no órgaun jestaun eleitorál. Alterasaun hirak ne'e apresenta ona ba Parlamentu no hein atu halo debate iha inísiu 2011. Bainhira promulga tiha, alterasaun hirak ne'e sei loke dalan ba organizasaun eleisaun nian ne'ebé prevee ba 2012. UNMIT no UNDP fó nafatin apoiu ba órgaun jestaun eleitorál sira (Comissão Nacional de Eleições no Secretariado Técnico de Administração Eleitoral) atu hametin sira-nia kapasidade institusionál hodi bele hala'o eleisaun iha futuro ho apoiu internasionál menus liu apoiu ne'ebé prezisa fó iha eleisaun nasionál 2007 (hatee parágrafo 64). Hatán ba karta ne'ebé Diretor Secretariado Técnico de Administração Eleitoral haruka ba UNMIT ho data 1 Outubru hodi husu Nasoins Unidas nia apoiu ba prosesu eleitorál iha 2012, no tuir resposta ne'ebé hato'o ba nia ho data 10 Outubru, Divizaun Asisténsia Eleitorál hosi Departamentu ba Asuntu Polítiku liu hosi ligasaun ho órgaun jestaun eleitorál sira no parte interesadu sira seluk sei hala'o avaliasaun ida ba nesesidade misaun nian iha inísiu 2011 hodi determina apoiu saida no oinsá mak prezisa.

13. Liu hosi koordenasaun ho Prezidente nia Gabinete, Parlamentu Nasionál no ho Gabinete Primeiru-Ministru nian, Komisaun Anti-Korrupsaun organiza iha 7 Dezembru semináriu ida ba membru Governu sira no funcionáriu boot sira analiza kona-ba oinsá atu halakon korrupsaun. Prezensa hosi Primeiru-Ministru, Visi Prezidente Parlamentu Nasionál, Prokuradór Jerál no Sekretáriu-Jerál Fretilin, no seluk tan, iha semináriu ne'e, fó korajen no reflète apoiu globál ba medida sira ne'ebé foti hasoru korrupsaun. Iha 9 Dezembru, bainhira komemora Loron Internasionál Anti-Korrupsaun, Komisaun Ati-Korrupsaun hala'o serimónia *tomada de posse* ba investigador na'in sanulu ne'ebé foin rekruta, inklui feto na'in rua. Prezidente Parlamentu Nasionál mós atende serimónia ne'e. Iha 20 Outubru, Tribunál Rekursu, uza poder konstitusionál ne'ebé atribui ba Tribunál Superior Administrativo, Fiscal e de Contas, ne'ebé sei dauk harii, emite ninia primeiru relatóriu kona-ba auditoria ba Orsamentu Estadu 2009, ne'ebé inklui krítika ba kontabilidade ba fundu públiku, liuliu falta detalle suficiente iha dokumentu relevante sira atu bele analiza loloos despeza ne'ebé halo. Biar iha alkanse limitadu, relatóriu ne'e estabese presedente ida ba revizaun judisiál ba konta públika.

14. Liu hosi ninia karta ho data 15 Setembru, Primeiru-Ministru fó hatene ba Prezidente Parlamentu Nasionál katak Visi Primeiru-Ministru no Ministru Negósius Estranjeirus hetan ona akuzasaun kona-ba krime *enriquecimiento ilícito* no abuzu autoridade. Liu hosi komunikadu imprensa ne'ebé sai iha 23 Novembru, Ministériu Negósius Estranjeirus fó hatene katak prezidente hosi painel juis sira iha Tribunál Distritu Dili halo

ona notifikasaun iha loron ne'e katak nia rejeita akuzasaun hotu-hotu ne'ebé foti hasoru Ministru Negósius Estranjeirus. Hatán ba rekursu ne'ebé Ministériu Públiku apresenta, Tribunál Rekursu konfirma iha 13 Dezembru desizaun ne'ebé Tribunál Distritu Dili foti. Iha televizaun nasional, iha 25 Novembru, Primeiru-Ministru hateten katak nia simu notifikasaun hosi Tribunál Distritu Dili atu suspende Visi Primeiru-Ministru, maibé nia hateten katak Governu sei hein desizaun hosi Tribunál Rekursu kona-ba rekursu ne'ebé ekipa defeza apresenta molok foti desizaun ruma. Julgamentu prevee atu hahú iha fulan Marsu 2011. Iha sinál ida ne'ebé di'ak tanba lider polítiku hotu-hotu ne'ebé halo deklarasaun pública kona-ba akuzasaun ne'e, inklui Primeiru-Ministru, subliña nesiedade atu respeita prosesu judisiál.

15. Durante períodu relatóriu ne'e nian, UNMIT, liu hosi kolaborasaun ho parte interesadu nasional sira, organiza forum tolu kona-ba governasaun demokrátika, ne'ebé fó tan oportunidade ba sidadaun sira atu halo interasaun ho sira-nia lider nasional sira. Forum hirak ne'e foka ba kestaun sira ne'ebé iha relasaun ho jestaun ba rekursu natural, veteranu no Objétivu Dezenvolvimentu Milénio nian; membru Parlamentu sira, funcionáriu públiku sira no representante sira hosi órgaun komunikasaun sosial no sociedade sivil partisipa mós iha forum hirak ne'e. Komisaun Funsau Públika desenvolve ona polítika ida atu muda pesoál temporáriu iha funsau pública ba estatutu permanente, ne'ebé hetan aprovasaun hosi Konsellu-Ministru iha 13 Outubru. Hosi funcionáriu públiku besik 50% ne'ebé oras ne'e daudaun iha kontratu temporáriu (besik 13,000), 31% mak feto. Ho apoiu hosi UNDP, Komisaun Funsau Públika desenvolve mós sistema informátiku kona-ba jestaun pesoál nian hodi fasilita desizaun informadu no planeamentu karreira nian ba funcionáriu públiku sira.

16. Hahú hosi Feveireu 2009, bainhira desenvolve estratéjia médiu-prazu (haree S/2009/72, parágrafo 47), halo ona progresu balu kona-ba objetivu no indikadór sira ne'ebe iha relasaun ho kultura governasaun demokrátika no diálogo. Kriasaun Komisaun Funsau Públika iha Agostu 2009 representa hakat ida ne'ebé pozitivu atu harii funsau pública ida ne'ebé efikás. Governu desenvolve tan ninia kapasidade atu utiliza órgaun komunikasaun lokal hodi ba to'o iha comunidade sira hodi esplika ninia polítika no programa sira, no ministériu barak mak halo tan esforsu atu envolve iha media. Governu hasa'e mós ninia orsamentu ba dezenvolvimentu iha distritu sira, maski funcionáriu públiku barak iha distritu no lider komunitáriu sira-nia kapasidade limitadu nafatin atu implementa no halo monitorizasaun ba despeza pública. Aleinde ne'e, Parlamentu kontinua halo supervizaun ba Governu nia atividade, ne'ebé partidu opozisaun Fretilin partisipa ativamente iha prosesu ne'e no kontribui iha debate parlamentár. Talvés indikadór importante liu kona-ba estabilidade ba tempu naruk nia laran no Timor-Leste nia rekuperasaun hosi akontesimentu sira iha 2006 mak prosesu eleitorál pasífiku iha 2012. Biar ida-ne'e ezije katak eleisaun nasional sira tenke kredível no transparente, susesu eleisaun nian mesak de'it la garante governasaun demokrátika. Komprensau kona-ba *checks and balance* no respeito ba ne'e entre órgaun soberania sira sei dauk metin didi'ak. Hanesan temi iha leten ne'e (haree parágrafo 3), iha mós preokupasaun ida kona-ba possibilidade katak korrupsaun sa'e daudaun, maski relatóriu ba dala uluk kona-ba auditoria hosi Tribunál Rekursu no kriasaun Komisaun Anti-Korrupsaun hatudu katak kapasidade institusionál atu komabate korrupsaun sa'e daudaun. Iha kontestu ida-ne'e, UNMIT kontinua fó asesoria júridika no polítika no apoiu ba Komisaun ne'e.

C. Manutensaun ba seguransa pública

17. Situasaun seguransa iha nasaun ne'e kontinua estavel, laiha insidente boot ruma ka dezorden pública mak tama iha krime sira ne'ebé fó hatene sai, inklui iha distritu sira ne'ebé polísia nasional simu hikas ona responsabilidade prinsipál polisiamentu nian. Eventu lubuk ida ne'ebé envolve konsentrasaun pública boot la'o ho hakmatek, inklui selebrasaun ba Loron Independénsia nian iha 28 Novembru no atividade sira ne'ebé partidu polítiku hala'o iha territóriu laran durante períodu relatóriu ne'e nian. Iha Dili, iha 18 Outubru, ema besik na'in ualunulu halo manifestasaun hasoru planu despeju, no iha 10 Novembru, estudante universitáriu besik na'in 100 halo manifestasaun iha Parlamentu Nasionál nia oin hasoru falta asisténsia loloos ba transporte. Manifestasaun rua ne'e hotu la'o ho hakmatek no partisipante sira koopera ho polísia.

18. Iha planu ida atu hamenus número polísia UNMIT durante períodu relatóriu ne'e nian, ne'ebé to'o 7 Janeiru iha polísia 1,480 (inklui feto 76) mak hala'o servisu; hosi número ne'e, 523 halo parte iha unidade polísia formadu, ne'ebé 326 halo servisu iha Dili (inklui 140 iha unidade Malázia, 140 iha unidade Portugés no 46 iha Unidade Pakistaun) no 197 iha distritu sira seluk (inklui 105 iha Unidade Bangladesh iha Baucau no 92 iha Unidade Pakistaun, ne'ebé 66 halo servisu iha Bobonaro no 26 iha Ermera). Biar polísia UNMIT kontinua hala'o knaar ne'ebé nia simu mandatu atu hala'o hodi aseguara interinamente ezekusaun lei nian - tanba retomada polisiamentu hosi polísia nasional aumenta ba beibeik - nia konsentra liután ninia atensaun hodi fó apoiu ba formasaun, kapasitasaun no dezenvolvimentu institusionál polísia nasional nian. Ligasaun metin ho forsa seguransa internasionál mantein nafatin.

19. Iha reuniaun téknika ida ikus kona-ba demarkasaun fronteira, ne'ebé hala'o iha Bogor, Indonézia, entre 27 no 29 Agostu (haree S/2010/522, parágrafu 20), foti desizaun ida katak sei halo reuniaun ida iha Novembru atu trata insidente hirak ne'ebé foin akontese iha área sira iha fronteira Distritu Oecussi nian ne'ebé sei dauk hakotu. Maibé, reuniaun ne'e muda fali ba loron seluk. Dezenvolvimentu pozitivu ida mak servisu tékniku konjuntu ne'ebé hala'o entre 27 Novembru no 8 Dezembru atu halo inspesaun ba marka sira iha fronteira no hadia rede geodesic ka geodésica. Hein katak parte rua ne'e kontinua envolve iha diskusaun ho objetivu atu ramata demarkasaun ne'ebé sei dauk ramata iha área sira iha fronteira ne'ebé sei dauk define (besik 3% hosi total fronteira rai nian) tuir kritériu tékniku ne'ebé parte sira konkorda tiha ona ba demarkasaun ne'e.

20. Ofisiál ligasaun militar hosi UNMIT kontinua fasilita relasaun traballu efetivu entre ajénsia seguransa fronteira nian hosi parte Timor-Leste no Indonézia, no halo monitorizasaun ba situasaun seguransa iha fronteira no iha Timor-Leste laran. Polísia UNMIT kontinua halo servisu hamutuk ho Polísia Nasionál nia Unidade Patrulla Fronteira iha pontu pasajen lima iha fronteira entre Timor-Leste ho Indonézia, ne'ebé parte rua ne'e halo patrullamentu konjuntu no fó apoiu no akonsellamentu. Unidade Patrulla Fronteira hala'o patrulla konjuntu ualu ho militar Indonézia sira iha área hirak ne'ebé sei dauk hakotu iha parte Distritu Oecussi entre 20 Outubru 2010 no 7 Janeiru 2011.

D. Apoiu no reforsu institusionál ba instituisaun seguransa sira

21. Tuir akordu ne'ebé Primeiru-Ministru halo ho Representante Espesiál iha 13 Maiu 2009 (haree S/2009/504, parágrafu 20), polísia nasional simu hikas responsabilidade prinsipál polisiamentu iha Distritu Aileu, iha 21 Setembru, no Distritu Manufahi, iha 24 Setembru, no mós Unidade Patrulla Fronteira, servisu imigrasaun no gabinete nasional INTERPOL nian, iha 28 Setembru. Hamutuk, polísia nasional simu ona responsabilidade prinsipál polisiamentu iha distritu sanulu no unidade neen, enkuantu Distritu Covalima no unidade rua (Gabinete Inspesaun Jerál no Auditoria no servisu investigasaun kriminal nasional) satisfás ona rekizitu sira no hein la kleur tan atu marka loron hodi entrega hikas responsabilidade ne'e. Entrega responsabilidade prinsipál polisiamentu nian ba polísia nasional iha distritu Bobonaro no Dili sei depende ba rekomendasaun hosi ekipa tékniku konjuntu. Prevee katak iha Janeiru 2011 sei halo avaliaun foun ba unidade haat ne'ebé determina tiha ona katak sei dauk pruntu atu simu responsabilidade ne'e. Entretantu, hanesan nota tiha ona iha ha'u-nia relatóriu ida ikus (S/2010/522, parágrafu 22), polísia UNMIT no polísia nasional halo dezenvolvimentu no implementasaun konjuntu ba medidas atu hametin polísia nasional Timor-Leste nia kapasidade institusionál, ho objetivu atu fasilita retomada responsabilidade polisiamentu ba polísia nasional iha distritu no unidade sira seluk. Medida hirak ne'e inklui reforsu ba polísia nasional nia kapasidade lojística no treinamentu espesífiku konjuntu, hanesan kompeténsia iha área administrasaun, investigasaun ba violénsia jéneru, kombate tráfico umanu no polisiamentu komunitáriu. Durante períodu relatóriu ne'e nian, sentru formasaun polísia, ho asisténsia hosi UNMIT nia eskritóriu relevante sira no ekipa Nasoins Unidas nian iha nasaun ne'e no parseiru bilateral sira, oferese kursu formasaun neenulu resin ida (61) ba polísia nasional 1,321 kona-ba funsaun prinsipál polisiamentu nian no mós kestaun sira seluk hanesan direitus umanus, sensibilizasaun kona-ba jéneru, violénsia doméstika, manutensaun ba kareta, fornimentu no lojística. Aleinde ne'e, polísia UNMIT fó formasaun ba polísia nasional haatnulu (40) atu prepara sira kona-ba possibilidade atu halo servisu iha Nasoins Unidas nia misaun manutensaun ba pás iha futuro. Polísia na'in ualu liu avaliaun ne'ebé ekipa selesaun Nasoins Unidas nian halo no hetan ona rekomendasaun hosi Sekretáriu Estadu Seguransa atu integra iha misaun ruma.

22. Iha distritu no unidade sira ne'ebé polísia nasional simu tiha ona responsabilidade prinsipál atu hala'o operasaun, polísia UNMIT kontinua hala'o knaar importante iha área akonsellamentu, formasaun, kapasitasaun no monitorizasaun, no mós kontinua disponivel atu fó apoiu operasionál no asisténsia ba polísia nasional iha sirkunstánsia estrema sira, se presiza no husu. Polísia UNMIT hosi unidade polísia formadu kontinua atu fó nafatin kursu hodi hasa'e kapasidade ba polísia nasional nia unidade espesiál, inklui kursu ba dala neen hosi kursu lubuk ida kona-ba *seguransa protesaun besik* (close security protection courses) no kursu atualizasaun ualu kona-ba kontrole distúrbu (ka riot control). Kona-ba espesialista sivil na'in 19 ne'ebé atu hatama tan iha komponente polísia UNMIT nian, ne'ebé atu fó liután atensaun hodi halo kapasitasaun ba polísia nasional no polísia nia dezenvolvimentu institusionál iha área espesifika sira (haree S/2010/522, parágrafu 59), to'o 7 Janeiru hili ona peritu na'in lima no halo ona rekomendasaun atu rekruta na'in lima seluk, no halo ona ezaminaun ba pozisaun sia seluk.

23. Iha reuniaun Komité Altu Nivel kona-ba Tranzisaun, hosi Governu no UNMIT, ne'ebé dirije hosi Prezidente, iha 25 Novembru (haree parágrafu 55 no 56 iha kraik), Komandante-Jerál polísia Nasionál halo

aprezentasaun ida kona-ba polísia nia planu dezenvolvimentu estratéjiku ba 2011-2012; iha planu ne'e nia define área prinsipál lima ba polísia nia dezenvolvimentu iha futuru – lejislasaun, formasaun, administrasaun, dixiplina no operasaun – no mós rekomendasaun espesifika kona-ba apoiu hosi polísia UNMIT iha área idaidak. Grupu traballu konjuntu hosi polísia UNMIT no polísia nasionál, ne'ebé harii iha Setembru atu dezenvolve planu ida kona-ba apoiu adisionál hosi UNMIT ba polísia nasionál nia kapasitasaun, bainhira polísia nasionál simu tiha responsabilidade prinsipál kona-ba polisiamentu iha distritu no unidade hotu-hotu, agora foka liliu ba área prinsipál lima ne'e. Hein katak esforsu hirak ne'e, ne'ebé buka atu promove Timoroan nia lideransa, bele asegura akordu mútuu hosi polísia nasionál no polísia UNMIT kona-ba objetivu kapasitasaun nian, modalidade nian no konteúdu formasaun nian, ne'ebé importante tebetebes atu hetan rezultadu ida ne'ebé efektivu. Planu ne'e sei refleto iha korrespondénsia karta entre parte rua ne'e, ne'ebé UNMIT ho Governu Timor-Leste halo daudaun negosiasaun, no sei define dispozisaun foun sira, ne'ebé, liu hosi akordu mútuu, sei la hanesan ho dispozisaun relevante sira hosi akordu suplementár kona-ba polisiamentu iha 2006. Iha dispozisaun foun sira-ne'e, entrega responsabilidade polisiamentu ba polísia nasionál sei marka inísiu faze rekonstituisaun nian no antesede sertifikasaun ba rekonstituisaun no kapasitasaun totál, ne'ebé sei akontese iha faze rekonstituisaun nia rohan.

24. Tuir espulsaun ba polísia nasionál na'in haat hosi Komandante Jerál Polísia nian – ida iha Juñu no tolu iha Dezembru 2010 – polísia na'in 199 (inklui fetu 11) tenke halo lai sertifikasaun definitivu tanba sei iha kestaun kriminal ka dixiplinár hasoru sira. Governu fó hatene ona katak hosi 199 ne'e, na'in 52 hetan akuzasaun kriminal no dixiplinár grave no na'in 147 hetan alegasaun kona-ba ofensa ne'ebé ladún todan hanesan sira ne'ebá. Maibé, iha karta ida ho data 28 Dezembru 2010, ne'ebé hato'o ba Primeiru-Ministru no Ministru Defeza no Seguransa Gusmão, Sekretáriu Estadu ba Seguransa fó hatene ninia desizaun atu certifika polísia na'in 199, ne'ebé nia hateten katak polísia hirak ne'e labele hakat liu kualkér responsabilidade kriminal ka dixiplinár se rezultadu prosesu ne'e nian prova katak sira halo duni sala. Desizaun ne'e apresenta ho baze iha revizaun no rekomendasaun hosi mekanizmu foun sertifikasaun nian ne'ebé Governu estabelese, ne'ebé uza Gabinete Inspesau Jerál no Auditoria no komisaun hodi akompaña prosesu promosaun iha Sekretaria Estadu Seguransa, ne'ebé subsistui Painel Avaliasaun, órgaun ida ne'ebé Timoroan sira mak dirije no ninia mandatu ramata iha 31 Dezembru 2009 (haree S/2010/522, parágrafu 21). Hau-nia Representante Espesial hato'o ona ninia preokupasaun ba lideransa Timor-Leste kona-ba sertifikasaun ba polísia na'in 52 ne'ebé hasoru akuzasaun kona-na krime grave.

25. Iha Dezembru 2010, Sekretáriu Estadu Seguransa no Komandante-Jerál Polísia Nasionál fó hatene ofisialmente planu rekrutamentu ba polísia na'in 250, ne'ebé atu hahú iha Janeiru 2011. Rekrutamentu ne'e sei foka ba sidadaun nasionál sira tinan 18 to'o tinan 23, ne'ebé fetu tenke representa pelumenus 10% hosi kandidatu sira.

26. Organizasaun Internasionál Migrasaun fó apoiu nafatin ba jestaun migrasaun nian no fronteira, liuliu ba tranzisaun servisu migrasaun nian ba ajénsia independente ida hosi polísia nasionál, liu hosi apoiu tékniku no jurídiku ba revizaun lei imigrasaun no azilu no ba faze inisial implementasaun ba jestaun sistema informasaun nian iha postu prinsipál sira iha fronteira. Grupu Traballu Interajénsia kona-ba Tráfiku, ne'ebé Ministériu Negósias Estranjeirus mak dirije, hala'o nafatin atividade kontra tráfiku, no fó mós asisténsia ba vítima sira tráfiku nian iha Programa Komún hosi Fundu Apoiu ba Konkretizasaun Objetivu Dezenvolvimentu Milénium nian.

27. Sekretaria Estadu Defeza no Falintil- Forças de Defesa de Timor-Leste (F-FDTL), halo nafatin esforsu atu dezenvolve F-FDTL nia rekursus umanus no kapasidade institusionál; iha esforsu ne'e UNMIT fó akonsellamentu kona-ba F-FDTL nia planu dezenvolvimentu 2011-2015 no planu dezenvolvimentu 2016-2020. Iha inísiu Outubru, Primeiru-Ministru Gusmão, iha ninia kapasidade nu'udar Ministru Defeza no Seguransa, aprova F-FDTL nia estrutura foun, ne'ebé prepara atu halo tan rekrutamentu ba membru atusneen (600). Oras ne'e prepara daudaun lei orgánika foun ida ba F-FDTL, projetu-lei ida kona-ba programasaun militar no projetu-lei ida kona-ba aprovisionamento militar. Durante período relatóriu ne'e nian, ho apoiu hosi UNMIT no parseiru bilaterál sira seluk no Nasoins Unidas, F-FDTL hala'o atividade formasaun oinoin, inklui atividade formasaun kona-ba direitus umanus, media, prosesu dixiplinár no investigasaun ba polísia militar. Ofisial ligasaun militar sira hosi UNMIT halo monitorizasaun kontínuu ba membru F-FDTL sira hodi prepara sira-nia servisu iha área fronteira hanesan ofisial ligasaun, no fó mós orientasaun ba militar lubuk ida hodi prepara sira atu bele loraun ida halo servisu iha Misaun Manutensaun Pás Nasoins Unidas nian.

28. Seksaun justisa F-FDTL nian, ne'ebé harii iha Juñu 2010 ho mandatu atu hala'o investigasaun dixiplinár, hahú halo ona investigasaun importante rua durante período relatóriu ne'e nian. Iha kazu ida, ne'ebé envolve uza kilat, resulta iha espulsaun ba miliár infratór; ida seluk, insidente ida ne'ebé iha alegasaun katak envolve asaltu ne'ebé ema sivil ida mate, oras ne'e iha sistema justisa (haree S/2010/522, parágrafu 31). To'o ohin,

seksaun justisa sei dauk hahú investigasaun ruma ba krize 2006 ne'ebé iha relasaun ho alegasaun ne'ebé envolve militar F-FDTL sira. Tuir Kódigu Diciplina Militar (Dekretu-Lei 17/2006), seksaun justisa iha tinan lima atu hahú halo investigasaun ba insidente ida bainhira insidente ne'e akontese tiha. To'o 7 Janeiro, membru F-FDTL na'in tolu ne'ebé hetan kondensasaun kona-ba *homicídio* no tentativa *homicídio* iha kazu ne'ebé tiru mate polisia nasional na'in ualu iha 25 Maiu 2006 kontinua serve nafatin ezérsitu no la submete ba kualkér medida dixiplinár internu (haree S/2010/522, parágrafu 34).

29. Progresu atu alkansa estratéjia médiu-prazu nia objetivu no pontu referénsia sira (benchmarks) iha área kona-ba apoiu ba instituisaun seguransa sira ladún klaru. Biar polisia nasional hametin tan ona ninia medida dixiplinár internu, sei prezisa haka'as an tan atu akompaña kazu hirak ne'ebé mak fó hatene sai (haree parágrafu 33 iha kraik). Biar seksaun justisa F-FDTL, ne'ebé harii iha Juñu 2010, hahú trata ona kazu sira dixiplina nian, prezisa halo tan esforsu, liuliu kona-ba formasaun ba militar iha nivel médiu no senior atu oinsá trata kestaun dixiplina nian. Iha jerál, devia hametin tan supervizaun sivil ba polisia nasional no F-FDTL, liuliu ba ida ikus ne'e. Biar lejislasaun trata ona polisia no F-FDTL nia funsaun no responsabilidade, prezisa klarifika no define di'ak liután papél hirak ne'e iha nivel operasionál no liu hosi kompromisu kontínuu iha nivel polítiku.

E. Apoiu ba revizaun globál ba setór seguransa

30. Hanesan temi iha ha'u-nia relatóriu ida ikus, Governu halo ona progresu notavel kona-ba quadru jerál lejislativu no polítiku ba setór seguransa (S/2010/522, parágrafu 29) no, durante prosesu ne'e, nia trata elementus barak ne'ebé identifika tiha ona iha proposta revizaun globál ba setór seguransa. Biar halo tiha ona promulgasaun ba lei seguransa nasional, defeza nasional no seguransa interna iha Abril 2010 (haree S/2010/522, parágrafu 29), sei prezisa tan lejislasaun, regulamentu no política subsidiária. Sekretáriu Estadu Defeza hateten iha audiénsia parlamentár ida iha 26 Novembru katak proposta Orsamentu Estadu ba 2011 halo referénsia ba estabesimentu mekanizmu no prosesu relevante sira. Proposta kona-ba política seguransa nasional, ne'ebé atu komplementa lejislasaun ne'ebé temi iha leten ne'e no, liu hosi kombinasun ho lejislasaun ne'e, fornese enkuadramentu globál ba setór seguransa, foin daudaun ne'e fila fali ba Sekretáriu Estadu Seguransa hodi halo revizaun, bainhira Konsellu Ministru analiza tiha (haree S/2010/522, parágrafu 29).

31. Finalizasaun ba dokumentu proposta nian kona-ba revizaun globál ba setór seguransa muda fali ba lora seluk. Agora daudaun, liu hosi konsulta ho UNMIT, Governu no Gabinete Prezidente Repúblika analiza dokumentu ne'e. Maski, parese iha probabilidade ki'ik katak dokumentu ne'e sei ramata iha futuru oin mai, elementus barak ne'ebé identifika iha proposta ne'e nia dokumentu ne'e trata ona, hanesan hateten iha leten (haree parágrafu 30), no, bainhira ramata tiha, dokumentu ne'e sei sai hanesan instrumentu referénsia ida ne'ebé útil.

32. Entretantu, esforsu ne'ebé Nasoins Unidas halo durante período relatóriu ne'e nian konsentra iha área kapasitasaun no asisténsia téknika, liuliu hosi projetu UNMIT/UNDP (haree S/2009/72, parágrafu 24). Inisiativa sira ne'ebé finansia iha projetu ne'e inklui apoiu hodi harii Institutu Defeza Nasional, ne'ebé loke iha 22 Dezembru. Fó mós apoiu ba protesau sivil, inklui apoiu iha área resposta nian ba emerjénsia sira ne'ebé kompleksu no dezastre naturál, no ba servisu bombeiros. Hala'o programa formasaun iha área planeamentu estratéjiku setór seguransa nian, jestaun no tékniku-operasionál, hanesan rádiu komunikaun no manutensaun, guarda sivil, seguransa privada no *alerta precoce* (early warning). Sosiedade sivil nia partisipasaun no debate polítiku kona-ba kestaun sira iha setór seguransa nian hetan impulsu hosi doasaun ki'ik oan sira ne'ebé fó ba organizasaun sira iha sosiedade sivil no hosi divulgasaun ba lei foun sira ne'ebé iha relasaun ho setór seguransa. Aleinde ne'e, liu hosi finansiamentu ba asesór na'in 16 (ne'ebé na'in ualu Timoroan), fó mós asisténsia téknika ba instituisaun oinoin Estadu nian. Nasoins Unidas, liu hosi inisiativa kapasitasaun no asisténsia téknika, sei fó nafatin apoiu ba Governu hodi bele hametin tan setór seguransa.

III. Promosaun ba direitus umanus no justisa

A. Apoiu ba monitorizasaun, promosaun no protesau ba direitus umanus

33. Durante período relatóriu ne'e nian, UNMIT simu alegasaun hasoru membru polisia nasional no alegasaun haat hasoru membru F-FDTL sira kona-ba violasaun direitus umanus sanulu resin ualu. Nota katak aplikasaun medida dixiplinár interna ba membru sira hosi forsa seguransa aumenta, liuliu polisia. Aplikasaun mekanizmu dixiplinár polisia nian inklui dokumentasaun ba prosesu keixa sira sai di'ak liu, atualizasaun ba banku-dadus ne'ebé uza hodi rejista keixa, inisiativa ba investigasaun ho baze iha relatóriu hosi fonte aleinde fonte sira vítima nian, no medida ezekusaun maka'as liu hodi garante implementasaun ba desizaun dixiplinár sira. Maibé, polisia,

Ministériu Públiku no tribunál sira, la trata lalais kazu violasaun. Nu'udar ezemplu, la foti akuzasaun kona-ba alegasaun katak iha 28 Dezembru 2009 polísia tiru mate ema sivil no halo kanek ema ida (haree S/2010/85, parágrafu 9, no S/2010/522, parágrafu 31). Aleinde ne'e, sei dauk foti mós kualkér akuzasaun kona-ba alegasaun ida katak membru F-FDTL sira halo asaltu grave ba ema sivil ida iha 27 Agostu 2010, ne'ebé rezulta iha ema ne'e mate (S/2010/522, parágrafu 31). Kona-ba alegasaun katak iha 21 Novembru 2009 polísia tiru ema sivil ida iha Dili, ne'ebé hetan kanek todan (S/2010/522, parágrafu 31), polísia ne'e, ne'ebé hetan tiha ona akuzasaun iha Dezembru 2010 kona-ba asaltu agravadu no asaltu negligente, hetan absolvisau hosi Tribunál Distritu Dili iha 3 Janeiru 2011, tanba laiha prova. Dezenvolvimentu pozitivu ida mak investigasaun ba alegasaun katak polísia oho ema sivil ida iha 3 Juñu 2007 iha Distritu Víqueque, ne'ebé uluk taka tiha tanba laiha prova, maybe Ministériu Públiku haruka loke fila fali kazu ne'e, ne'ebé oras ne'e ninia eskritóriu iha Distritu Baucau analiza daudaun.

34. Biar tuir Kódigu Penál 2009, violénsia doméstika konsidera hanesan krime públiku, iha kazu lubuk ida ne'ebé envolve violénsia doméstika no violénsia jéneru sira seluk mak kontinua hakotu hosi mekanizmu tradisionál, ne'ebé dala barak la'ós konsistente ho padraun internasionál direitus umanus. Liu hosi Programa Komún hosi Fundu Apoiu ba Konkretizasaun Objektivu Dezenvolvimentu Miléniu nian, Fundu Nasoins Unidas ba Populasaun (UNFPA) no UNIFEM fó daudaun apoiu ba Sekretáriu Estadu ba Promosaun Igualdade hodi hala'o formasaun ba lider komunitáriu sira, mestri no estudante sira ho objetivu atu halo sensibilizasaun no hala'o diálogu prinsipál sira kona-ba oinsá atu bele hapara violénsia doméstika (haree S/2010/522, parágrafu 39). UNIFEM mós fó nafatin asisténsia téknika ba membru Parlamentu sira hodi tulun garante elaborasaun orsamentál ida ne'ebé sensitivu ba kestaun jéneru, inklui alokasaun rekursus ba implementasaun lei hasoru violénsia doméstika.

35. Progresu kontinua la'o neineik kona-ba responsabilizasaun ba ema hirak ne'ebé responsavel kona-ba krime no violasaun grave direitus umanus nian durante krize 2006, inklui krime sira seluk hanesan Komisaun Espesiál Independente Inkéritu nian rekomenda (haree S/2006/628, parágrafu 24, no S/2010/522, parágrafu 34). To'o 7 Janeiru 2010, foti ona desizaun finál ba kazu hitu, ne'ebé rezulta iha kondensasaun 9 no absolvisau 43, enkuantu kazu haat taka. Tuir akuzasaun ne'ebé Ministériu Públiku foti hasoru ema na'in sanulu resin lima no pedídu atu prende ema na'in neen ne'ebé iha relasaun ho familia De Silva nia uma ne'ebé sunu iha 25 Maiu 2006, hodi rezulta iha Rogério Lobato, ne'ebé baltura ne'ebá Ministru Interior, nia maluk na'in neen mate, ema na'in lima hosi grupu ne'e hetan dadur iha 11 Novembru no oras ne'e iha liberdade kondisionál hodi hein julgamentu.

36. Liu hosi programa konjuntu entre UNDP no OHCHR, kontinua halo esforsu atu hametin Provedoria Direitus Umanus no Justisa. Esforsu ne'e inklui formasaun (ne'ebé tama mós formasaun kona-ba abordajen ba kestaun direitus umanus) no akompañamentu, no mós oportunidade atu halo interasaun ho atór internasionál no rejionál sira iha área direitus umanus nian. Provedoria hetan ona progresu signifikativu iha ninia primeiru planu estratéjiku, ne'ebé hetan benefisiu hosi konsulta regulár ho eskritóriu rejionál sira no organizasaun sira iha sosiedade sivil. Hanesan mós rezultadu hosi inisiativa hirak ne'e, Provedoria nia kapasidade sa'e daudaun. Maibé, iha nafatin preokupasaun tanba instituisaun ne'e sei hasoru difikuldade atu implementa ninia mandatu ho efetividade, tanba orsamentu la to'o no falta pesoál, liuliu ba postu sira ne'ebé iha no pesoál sira iha distritu.

37. UNMIT fó apoiu tékniku no finanseiru ba Provedoria hodi prepara Konsellu Direitus Umanus nia revizaun periódika universál 2011 ba Timor-Leste, inklui promosaun ba koñesimentu kona-ba mekanizmu no elaborasaun ba planu asaun. Ida-ne'e inklui apoiu ba Provedoria nia kooperasaun ho sosiedade sivil hodi prepara relatóriu konjuntu ida ba Konsellu Direitus Umanus, ne'ebé prazu ramata iha Marsu 2011. Hosi Outubru 2010 to'o 7 Janeiru 2011, Governu, ho apoiu hosi UNMIT no UNDP, halo konsulta públika iha nivel distritu kona-ba prosesu revizaun periódika universál. Komisaun Nasionál kona-ba Direitu Labarik nian, ho apoiu hosi UNICEF, OHCHR no UNMIT, hala'o nafatin atividade sensibilizasaun públika kona-ba Konvensaun kona-ba Direitu Labarik nian.

38. UNMIT nia Ekpa Investigasaun ba Krime Grave, ne'ebé funsiona iha Ministériu Públiku nia okos, halo nafatin investigasaun ba kazu violasaun direitus umanus grave ne'ebé komete iha 1999, iha distritu sanulu resin ida hosi distritu 13 ne'ebé iha. To'o 7 Janeiru 2011, ekpa ne'e ramata ona investigasaun atusida ualunulu resin haat hosi kazu pendente 396, ne'ebé ruanulu resin ida ramata durante períodu relatóriu ne'e nian. Kazu 18 halo daudaun investigasaun ba, inklui kazu rua ne'ebé iha relasaun ho alegasaun kona-ba violénsia jéneru. Atu bele halo prosesu investigasaun la'o lalais ba kazu pendente sira, UNMIT aumenta ekpa investigasaun iha ninia Ekpa Investigasaun ba Krime Grave hosi lima ba sanulu resin ida no iha planu atu aumenta tan to'o 14 iha primeiru trimestre 2011, ho objetivu atu garante katak investigasaun hotu-hotu ramata iha 2012.

39. UNMIT, liu hosi kolaborasaun ho Nasoins Unidas nia ajénsia, fundus no programa sira, fó nafatin prioridade boot ba polítika toleránsia-zero ba esplorasau no abuzu seksuál, liu mós hosi formasaun obrigtóriu ba Nasoins Unidas nia funsionáriu hotu-hotu, avaliasau no monitorizasaun ba fatin sira ne'ebé iha asesu restritu no programa sensibilizasaun públika kona-ba norma hahalok nian ne'ebé hein katak funsionáriu Nasoins Unidas tomak tenke tuir. UNMIT mós hala'o nafatin ninia atividade sensibilizasaun iha estratéjia "UN Cares" nia okos. Durante períodu relatóriu ne'e nian, funsionáriu atushaat resin haat (inklui feto na'in 63) hosi UNMIT no Nasoins Unidas nia ajénsia, fundus no programa sira, simu formasaun kona-ba HIV/AIDS. Aleinde ne'e, UNMIT hala'o mós programa kapasitasaun iha área sensibilizasaun jéneru nian, violénsia doméstika no tráfiu umanu ba funsionáriu atustolu haatnulu (inklui feto 82) hosi polísia UNMIT no pesoál sivil; fó mós formasaun ba polísia 53 hosi UNMIT no PNTL kona-ba análise jéneru nian, ne'ebé inklui feto na'in ruanulu resin tolu.

B. Apoiu ba kapasitasaun no konsolidasaun sistema justisa nian

40. Tuir estatístika ne'ebé Ministériu Públiku fó sai, númeru prosesu penál pendiente sa'e ba 4,847 iha Novembru nia rohan hosi 5,092 iha Setembru nia rohan. Durante períodu hanesan ida-ne'e, kazu foun hosi prosesu penál 828 maka tama iha rejistu, ne'ebé hatudu katak konfiansa ba sistema justisa formál mantein, no Ministériu Públiku analiza ona kazu 787. UNDP fó apoiu tékniku no finanseiru hodi dezenvolve sistema pilotu kona-ba jestaun integradu ba instituisau sira iha área oinoin justisa nian (haree S/2010/522, parágrafu 38), ne'ebé sai operasionál iha fulan Outubru nia rohan iha Ministériu Públiku, ba períodu esperimentál fulan tolu. Iha planu katak, liu tiha períodu esperimentál ne'e, sistema jestaun ba kazu sira sei estende ba Defensoria Públika no servisu nasional prizaun nian no reinsersau sosiál, no sei estende mós ba polísia nasional. Liu hosi koordinasaun ho Ministériu Públiku, UNMIT fasilita ona semináriu rua ne'ebé kontribui atu hametin kooperasaun entre polísia no prokuradór sira.

41. Grupu traballu ida, ne'ebé Diretór Nasionál Prizaun mak derije, ho apoiu hosi UNMIT, harii iha Dezembru atu define enkuadramentu polítiku ba prizaun no reinsersau sosiál sira-nia jestaun no operasaun iha 2011. UNMIT, UNFPA no UNIFEM fó apoiu ba Governu hodi halo divulgasaun no sensibilizasaun ba parte interesadu lubuk ida kona-ba lei kontra violénsia doméstika. Polísia nasional na'in ruanulu, hosi Unidade Ema Vulneravel, ramata ona kursu ne'ebé UNFPA oferese kona-ba investigasaun ba violénsia jéneru nian. Sentru Fomasaun Jurídika, ho UNDP nia apoiu, inklui ona formasaun kona-ba lei hasoru violénsia doméstika iha ninia kurríkulu ba atór judisiál nasional hotu-hotu no inkorpora iha programa formasaun foun sira (liuliu ba juis, prokuradór, defensór no advogadu privadu sira módulus kona-ba instrumentu internasionál sira ne'ebé iha relasaun ho jéneru).

42. Halo tan ona progresu atu alkansa estratéjia médiu-prazu nia objetivu iha área estado de direito, justisa no direitos umanus, inklui sira ne'ebé iha relasaun ho Planu Estratéjiku Setór Justisa nian ba Timor-Leste (haree S/2010/522, parágrafu 4 no 38). Ekipa Investigasaun ba Krime Grave kompleta ona kuaze metade investigasaun hotu-hotu ba krime hasoru umanidade no krime grave sira seluk. Kazu hotu-hotu ne'ebé Komisaun Independente Inkéritu nian rekomenda atu foti prosesu judisiál hetan ona investigasaun maibé uitoan de'it mak lori ba julgamentu; iha julgamentu, ema lubuk ida hetan absolvisau tanba laiha prova. Prepara no ezekuta ona lejislasau prinsipál, ne'ebé inklui Kódigu Penál no lei hasoru violénsia doméstika. Aleinde ne'e, prepara no diskuti ona ho autoridade judisiál nasional sira, sosiedade sivil no parseiru internasionál sira, ho apoiu tékniku hosi UNDP, projetu kona-ba lei rai nian (no lejislasau subsidiária ne'ebé iha relasaun ho lei ne'e), lei espropriasaun no lei fundu finanseiru. Projetu-lei hirak ne'e bele hetan apresiasau hosi Parlamentu iha 2011.

43. Númeru juis, prokuradór no defensór públiku nasional sira sa'e ba 51 (inklui feto 14), no tranzisaun atór jurídku internasionál sira hosi *função destacada* (line functions) ba funsaun asesoria iha instituisau justisa sira kontinua nafatin. Biar Konsellu Superior Prokuradoria no Konsellu Superior Majistratura Judisiál funsiona ona, Konsellu Superior Defensoria Públika sei dauk harii no laiha asosiasau advogadu independente. UNDP fó nafatin apoiu ba Sentru Formasaun Jurídika, ne'ebé rezulta iha reforsu ba atór nasional sira-nia kapasidade; nu'udar ezemplu, funsionáriu 56 hosi tribunál sira no Defensoria Públika ramata ona formasaun iha 2010. Sistema korretivu hetan ona progresu notavel, tantu iha nivel polítiku no iha nivel programa nian, ne'ebé halo infra-estrutura sira iha kadeia no tratamentu ba ema dadur sira sai di'ak liután. Maibé, sei presiza satisfás rekizitu barak, inklui fasilidade ketak iha kadeia laran ba feto no ba labarik sira, servisu edukasaun nian ba labarik sira no servisu ba ema ne'ebé iha defisiénsia mental, no mós formasaun profesionál ba ema dadur hotu-hotu. Provedoria Direitos Umanus no Justisa sei presiza nafatin asisténsia téknika, haree ba ninia limitasaun orsamentál no rekursus umanus; aleinde ne'e, dala barak mak rekomendasau hirak ne'ebé nia hato'o ba instituisau sira seluk Estadu nian la hetan implementasaun. Maiski nune'e, Provedoria funsiona hanesan órgaun independente ida no iha papél lideransa kona-ba protesaun no promosaun ba direitos umanus.

44. Asesu ba justisa hetan ona progresu iha setór balu iha populasaun nia leet, liuliu iha área rurál, maski servisu apoiu jurídiku efektivu iha distritu sei sai nafatin problema tanba Estadu sei dauk harii rejime ida ne'ebé abranje nasaun tomak. Sei dauk halakon obstákulu espesífiku sira ne'ebé fetu sira hasoru iha área jéneru nian (haree S/2010/85, paras. 82 no 87). Tribunál movel tolu ne'ebé harii ona representa iniciativa di'ak, ho objetivu atu hadia asesu ba justisa iha nivel distritu. Defensoria Pública, ho apoiu hosi UNDP, organiza forum regulár kona-ba justisa, ho objetivu atu hasa'e sensibilizasaun no komprensasaun iha populasaun nia leet kona-ba instituisaun justisa hotu-hotu nia knaar no mandatu no ninia interasaun ho sistema justisa tradisionál.

IV. Apoiu ba programa prioridade nasional sira, dezvoltimentu sosial no ekonomiku no assistensia umanitaria

A. Apoiu ba programa prioridade nasional sira-nia prosesu

45. Iha 2 Dezembru, hala'o iha Dili parseiru dezvoltimentu sira-nia sorumutu trimestral ba dala tolu, ne'ebé Visi Primeiru-Ministru no Ministru Finansas mak dirije; sorumutu ne'e identifika katak halo ona progresu di'ak iha 2010 atu hetan prioridade nasional nia objetivu sira ne'ebé konstitui pakote internasionál ba Timor-Leste (haree S/2008/501, paragrafu 36). Liu hosi kooperasaun metin ho Banku Mundiál, UNMIT fó nafatin apoiu ba sekretariadu kona-ba prioridade nasional. Grupu traballu sira kona-ba prioridade nasional iha área justisa, agrikultura no seguransa ai-han nian hasa'e ona sira-nia efisiensia. Maibé, hahú hosi Jullu 2010 to'o ohin, grupu traballu kona-ba infra-estrutura sei dauk halibur.

46. Iha 30 Novembru, Komité Diretór ba Dezvoltimentu Objetivu Milénio nian, ne'ebé Ministru Finansas mak dirije, hala'o ninia sorumutu ba dala tolu iha 2010. Komité ne'e aprova planu traballu abranjente ba 2011, ne'ebé inklui área divulgasaun, monitorizasaun no avaliasaun ba Dezvoltimentu Milénio nia Objetivu.

B. Dezvoltimentu sosial no ekonomiku

47. Despeza pública kontinua kria impulsu ba ekonomia nia espansaun iha 2010. Iha primeira metade 2010, presaan inflasaun nian sa'e permanente, liuliu iha Dili, prinsipalmente tanba sereál nia folin iha merkadu internasionál sa'e maka'as. Hanesan iha tinan sira liu ba, hein katak despeza Estadu nian sei sai hanesan motór prinsipál ba dezvoltimentu ekonomiku iha 2011. Orsamentu 2011, ne'ebé detabe daudaun iha Parlamentu Nasionál, sai besik millaun \$985, hosi orsamentu ne'e fundu boot ida mak aloka ba dezvoltimentu infra-estrutura nian.

48. Iha 20 Outubru, Primeiru-Ministru Gusmão publica rezultadu preliminar hosi sensus 2010 kona-ba populasaun no uma, relatório kompletu kona-ba sensus ne'e atu sai iha Abril 2011. Sensus ne'e, ne'ebé Diresaun Nasionál Estatística hosi Ministériu Finansas mak hala'o, ho apoiu hosi UNFPA, hatudu katak populasaun nia taxa kreximentu total anuál tun hosi 3.32% entre 2000 no 2004 ba 2.41 entre 2004 no 2010. Iha 10 Dezembru, Sekretáriu Estadu ba Formasaun Profisionál no Empregu publica rezultadu prinsipál sira hosi peskiza ida kona-ba Timor-Leste nia *mão de obra* (work force) ne'ebé Diresaun Nasionál Estatística mak hala'o ho apoiu tékniku hosi International Labour Organization (ILO). Rezultadu hosi peskiza ne'e subliña dezafiu ne'ebé iha kona-ba meu subsistensia no oportunidade empregu, inklui iha área rurál no ho relasaun ba joven sira.

49. Iha 13 Dezembru, Ministru Finansas no Visi Ministru Saúde publica relatório final kona-ba levantamento demográfiku no saúde nian iha 2019-2010, ne'ebé hala'o mós hosi Diresaun Nasionál Estatística ho apoiu hosi ekipa Nasoins Unidas nian iha Timor-Leste no doador bilateral sira. Rezultadu hatudu katak hahú 2003 to'o ohin halo ona progresu iha Objetivu Dezvoltimentu Milénio nia indikadór kriticu balu - taxa mortalidade infantil tun hosi 60 ba 45 iha kosok rehun idaidak ne'ebé moris, no iha taxa fertilidade tun hosi 7.8 ba 5.7 ba fetu ida. Levantamentu ne'e mós konfirma katak taxa mortalidade hosi labarik tinan lima mai kraik tun hosi 83 ba 64 iha kosok rehun idaidak ne'ebé moris (haree S/2010/522, paragrafu 46). Maibé, taxa mortalidade materna aas nafatin, ne'ebé inan atuslima limanulu resin hitu mak mate iha kosok rehun idaidak ne'ebé moris, no labarik

sira-nia kondisaun nutrisaun reprezenta preokupasaun boot, tanba labarik 52% ho tinan lima mai kraik mak todan ki'ik liu no 53% nia kreximentu hetan atrazu.

50. Governu, ho apoiu hosi World Food Programme iha área balu, liu hosi programa kona-ba inan no labarik nia saúde no nutrisaun, programa kona-ba ai-han iha eskola, programa kona-ba ai-han ba servisu/ativu (work/assets) no programa kona-ba *assistência e alívio* (relief support), fó nafatin ai-han ba ema 295,000 ne'ebé hasoru inseguransa ai-han no vulneravel liu iha nasaun ne'e. Ai-han oinoin liu tonelada atuslima mak prodús iha rai-laran no fahe ba fetu no labarik sira ne'ebé hasoru malnutrisaun iha distritu pilotu tolu (Aileu, Ermera no Oecussi), liu hosi programa kona-ba inan no labarik nia saúde no nutrisaun.

51. Durante período relatóriu ne'e nian, ILO la para fó assisténsia ba Sekretaria Estadu Formasaun Profisionál no Empregu hodi tau matan ba taxa dezempregu, liuliu dezempregu iha joven sira-nia leet. Nia fó orientasaun kona-ba karreira, halo mediasaun ho susesu kona-ba hetan empregu no fó apoiu ba kursu formasaun hodi hasa'e kompeténsia ba joven lubuk oan ida.

52. Nu'udar resposta nasaun ne'e nian ba dezafiu hosi mudansa klimátika, Secretaria de Estado do Meio Ambiente e Reflorestamento, ho assisténsia hosi UNDP, prepara programa adaptasaun nasional ba mudansa klimátika, liu hosi prosesu ida ne'ebé inkluzivu no envolve Governu, sociedade sivil, organizasaun internasionál sira no setór privadu. Sumáriu hosi dokumentu programa ne'e nian apresenta ona ba Konferénsia Nasoins Unidas kona-ba Mudansa Klimátika, iha Cancún, Mexico, iha Dezembru 2010. Programa ne'e nia finalizasaun reprezenta kumprimentu ba kompromisu ne'ebé Timor-Leste asumi iha Kuadru Konvensaun Nasoins Unidas nian kona-ba Mudansa Klimátika.

53. Halo ona progresu atu alkansa estratéjia médiu-prazu nia objetivu no pontu referénsia sira iha nivel desenvolvimentu sosiál no ekonómiku. Maski populasaun 41% moris kiak nafatin, grupu balu nia kondisaun moris sai di'ak daudaun ona. Tuir krizi ekonómiku ne'ebé akontese hafoin violénsia iha 2006, Governu introdús pakote bem-estar sosiál ba katuas-ferik no ema vulneravel sira no mós projetu infra-estrutura no *mão de obra* intensivu iha comunidade hodi fó rendimentu ba umakain sira ne'ebé kiak liu. Maibé, desenvolvimentu sustentavel iha nivel subsisténsia nian no oportunidade empregu iha área rural sei sai nafatin dezafiu. Preokupasaun ida mak nivel aas dezempregu iha joven sira-nia leet no potencialidade ne'ebé nia reprezenta kona-ba deziluzsaun no instabilidade sosiál - Governu presiza fó atensaun ba problema boot ida-ne'e. Ema sira ne'ebé sai hosi sira-nia hela-fatin iha krizi 2006 fila ona no re-integra daudaun iha sira-nia comunidade. Ministériu Solidariedade Sosiál analiza ona reklamasau 4,600 ne'ebé ema deslokadu internu sira apresenta; hosi número ne'e, identifika ona katak ema besik rehun ida mak iha direitu atu simu kompensasaun finanseira (haree S/2010/522, parágrafu 52). Esforsu atu mantein diálogu ho objetivu atu fó apoiu ba re-integrasaun sustentavel sei hetan assisténsia hosi servisu ne'ebé Departamento do Ministério da Construção da Paz e da Coesão Social halo (haree parágrafu 11 iha leten). Arkitetura kona-ba jestaun ba dezastre, ne'ebé presiza iha hodi bele hatán ba dezafiu umanitáriu iha loron aban, oras-ne'e halo daudaun revizaun (haree parágrafu 54 iha leten).

C. Assisténsia umanitária

54. Laiha insidente umanitáriu boot mak akontese durante período relatóriu ne'e nian, maski rejista nafatin inundaun ki'ik oan balu iha fatin-fatin ne'ebé Governu hatán ho efikásia no la'ho kualkér apoiu lojístiku hosi Nasoins Unidas. Iha 2 no 3 Dezembru, Governu, ho apoiu hosi UNMIT, Gabinete Koordenaun ba Asuntu Umanitáriu no UNDP, hala'o semináriu ida kona-ba "governu nia abordajen lubuk ida atu hatán ba dezastre" hodi halo revizaun ba polítika no prosedimentu ne'ebé iha no dezenvolve rekomendasaun atu harii kuadru nasional ida efetivu hodi hatán ba dezastre, bazeia ba esperiéncia hosi nasaun sira seluk iha rejiaun ne'e.

V. Preparasaun ba tranzisaun

55. Prosesu tranzisaun hetan tan ona progresu. Tuir akordu ne'ebé halo iha 17 Setembru atu estabeselese mekanizmu implementasaun no planu tranzisaun konjuntu ne'ebé grupu diretór ida (ka steering group) ho nivel aas mak atu halo supervizaun ba (haree S/2010/522, parágrafu 66), no tuir informasaun ne'ebé ha'u nia Representante Espesiál hato'o ba Konsellu Ministru, Prezidente hala'o iha 25 Novembru Komité Altu Nivel nia reuniaun trimestral ba dala uluk kona-ba tranzisaun, ne'ebé partisipa Primeiru-Ministru no representante sira seluk hosi Governu, Komandante F-FDTL no Komandante Jerál Polísia Nasionál no mós ha'u-nia Representante Espesiál no Representante Espesiál Adjuntu no ekipa jestaun senior. Halo akordu ida katak Komité Altu Nivel mak atu fó matadalan ba tranzisaun nia prosesu no modalidade. Komité ne'e sei analiza

nesesidade ne'ebé iha iha UNMIT nia mandatu nia área hotu-hotu hodi define, ho governu no ho parte interesadu no parseiru sira seluk, apoiu ne'ebé mak devia mantein to'o UNMIT ramata nia mandatu, inklui nivel no perfil ne'ebé presiza hosi pesoál. Komité ne'e sei foka mós nia atensaun atu asegura katak UNMIT nia apoiu transfere efetivamente, hanesan apropriadu, ba Estadu nia instituisaun sira, parseiru bilaterál no multilaterál sira, entidade sira hosi ekipa Nasoins Unidas nian iha nasaun ne'e no sosiedade sivil.

56. Iha ninia reuniaun iha 25 Novembru, Komité Altu Nivel mós konkorda atu harii grupu traballu tékniku atu foka ba área prinsipál hitu: governasaun demokrátika; polísia no setór seguransa; estado de direito, justisa no direitus umanus; dezvoltimentu sosiál no ekonómiku; misaun nia apoiu no lojístika; formasaun ba pesoál nasional Nasoins Unidas nian; impaktu ba ekonomia lokal bainhira Misaun sai. Hein katak Governu no UNMIT nia pontu fokál sira iha área idaidak sei garante katak grupu traballu idaidak sei atua iha maneira ida ne'ebé hatán ba prioridade no preokupasaun nasional sira. Grupu traballu tolu ne'ebé foka ba polísia no setór seguransa, misaun nia apoiu no lojístika no estado de direito, justisa no direitus umanus, hahú ona sira-nia servisu. Halo daudaun, no sei halo nafatin konsulta regulár durante prosesu tranzisaun, inklui reuniaun no 'briefing' ho parte interesadu sira seluk, inklui partidu polítiku sira, sosiedade sivil no doador sira. Hanesan temi iha leten, diskusaun ne'ebé halo iha 25 Novembru foka mós ba área polisiamentu no misaun nia apoiu (haree para, 23 iha leten).

VI. Aspetu finanseiru

57. Assembleia Jerál, liu hosi rezolusaun 64/276, deside atu apropria millaun \$206.3 ba UNMIT nia manutensaun iha períodu entre 1 Jullu 2010 no 30 Juñu 2011. To'o 30 Novembru 2010 kontribuisaun ba Konta Espesiál UNMIT nian ne'ebé sei dauk selu sai hamutuk millaun \$37.9. Dívida hosi kontribuisaun total ba operasaun manutensaun pás hotu-hotu to'o iha loraun ne'ebá sai millaun \$2,746.9. Se Konsellu Seguransa aprova atu hanaruk tan UNMIT nia mandatu liu 26 Feveireiru 2011, kustu atu mantein Misaun to'o 30 Juñu 2011 sei limita ba montante ne'ebé Assembleia Jerál aprova tiha ona.

58. To'o 31 Dezembru 2010, montante total ne'ebé deve ba nasaun sira ne'ebé kontribui ho polísia sai millaun \$2.0. Tuir planu trimestral pagamentu nian, selu fila ona kustu pesoál nian no ekipamentu ne'ebé pertense ba kontijente sira durante períodu ne'ebé ramata iha 30 Novembru 2010 no 30 Setembru 2010.

VII. Observasaun

59. Ita laran-ksolok bainhira haree katak retomada responsabilidade prinsipál polisiamentu nian ba polísia nasional la'o ba oin nafatin (haree parágrafu 21-23 iha leten) no katak retomada ne'e sei kompleta iha distritu no unidade hotu-hotu iha fulan sira mai ne'e. Bainhira kompleta tiha retomada ne'e faze rekonstituisaun nian hahú, iha altura ne'e UNMIT, tuir arranju ne'ebé sei hakotu ho Governu (haree parágrafu 23 iha leten), sei entrega ba polísia nasional responsabilidade kona-ba diresaun, komandu no kontrole ba polísia nia operasaun tomak iha Timor-Leste. Akordu foun entre UNMIT no Governu sei inklui mós elementu sira kona-ba apoiu ne'ebé UNMIT atu fó ba polísia durante faze rekonstituisaun nian.

60. Liu tiha retomada, sei iha nafatin nesesidade kona-ba polísia UNMIT nia prezensa atu fó nafatin apoiu ba polísia nasional nia dezvoltimentu institusionál no kapasitasaun adisionál no mós apoiu operasionál, bainhira presiza no husu, to'o sertifikasaun ba polísia nasional nia rekonstituisaun no kapasidade kompleta iha faze rekonstituisaun nia rohan. Tuir Komandante-Jerál polísia nasional hateten iha ninia apresentasaun iha Komité Altu Nivel nia Reuniaun kona-ba Tranzisaun, iha 25 Novembru, Governu husu atu polísia UNMIT mantein ninia prezensa to'o 2012, atu fó, entre buat seluk, apoiu ba polísia iha área sira hanesan kapasitasaun, dezvoltimentu kompeténsia, knaar spesífiku kona-ba akonsellamentu iha distritu no unidade hotu-hotu, no mós formasaun especializada, spesífika iha área sira hanesan investigasaun kriminal, polisiamentu komunitáriu, dixiplina, administrasaun (inklui jestaun ba rekursu umanu no finanseiru), operasaun, polisiamentu iha fronteira, unidade polísia spesiál no asuntu juridiku. Sei presiza polísia UNMIT nia prezensa ho número ne'ebé nato'on atu bele hala'o atividade kapasitasaun boot ida-ne'e no mós atu fó apoiu operasionál ba polísia nasional iha sirkunstánsia extrema sira, se presiza no husu, inklui apoiu durante períodu kritical eleisaun prezidensial no parlamentár iha 2012. Ida-ne'e sei presiza mós UNMIT nia unidade polísia formadu nia prezensa ne'ebé sei hala'o knaar ida importante, liuliu iha área formasaun no apoiu ba seguransa durante eleisaun sira. Tanba Governu husu ona apoiu bilaterál atu hametin polísia nasional, aleinde apoiu ne'ebé UNMIT atu fó, Governu nia koordinasaun ba programa apoiu oinoin importante tebetebes, atu bele garante sira-nia komplementaridade.

61. Enkuantu ne'e, halo daudaun rekonfigurasaun ba polisia UNMIT hodi bele tau iha konsiderasaun sira-nia knaar nia natureza oin seluk iha Timor-Leste (haree S/2010/522, paragrafu 60). Numeru polisia UNMIT, ne'ebé menus tiha ona, sei hamenus tan gradualmente, hosi numeru inisial autorizadu 1,608 no 1,480 ne'ebé iha ba 1,280 iha Juñu 2011 (husik nune'e polisia individual 790 no 490 iha unidade polisia formadu). Polisia UNMIT nia numeru ida-ne'e sei mantein to'o 2012 nia klaran, to'o liu tiha eleisaun; iha altura ne'eba, prevee atu halo redusaun lalais maibe sei haree ba situasaun iha rai-laran no rezultadu hosi avaliasaun independente kona-ba situasaun polisia nasional nian (haree S/2010/522, paragrafu 60) no sei haree mos ba avaliasaun hosi peritu polisia Nasoins Unidas nian, ne'ebé sei hala'o tuir mai, atu haree ba polisia UNMIT nia rekonfigurasaun ba Misaun nia mandatu ne'ebé sei resin. UNMIT fó sai ona ninia apoiu ba avaliasaun independente ba polisia nasional iha faze rekonstituisaun nian, hanesan Governu sujere. Komponente prinsipal ida seluk hosi estratjia konjunta ho Governu kona-ba tranzisaun mak atu asegura katak tranzisaun atividade kapasitasaun no apoiu institusional kontinuu ba polisia nasional nian ba parseiru bilateral/multilateral sir aka ba Nasoins Unidas sai efetivu.

62. Desizaun Governu nian atu halo sertifikasaun final ba polisia na'in 52 ne'ebé hetan akuzasaun dixiplinar grave no kriminal halo laran-taridu no kontra arranju kona-ba polisiamentu suplementar 2006 nia espiritu. Maibe, Governu hateten ona katak polisia hirak ne'e sei la sai inzentu ba prosesu dixiplinar no kriminal adisional. Hanesan ha'u-nia Representante Espesial husu ona, ha'u mos husu ba Governu no autoridade judisial sira atu foti medida hotu-hotu ne'ebé presiza hodi garante polisia nasional nia integridade.

63. Haree ba vontade ne'ebé Presidente Timor-Leste, Presidente Parlamentu Nasionál, Primeiru-Ministru no lider opozisaun hato'o ba ha'u-nia Representante Espesial, no haree ba nesesidade atu fó nafatin apoiu iha Misaun nia área mandatu sira ne'ebé importante tebetebes, ha'u rekomenda atu hanaruk tan Misaun nia mandatu ba fulan sanulu resin rua, ho kompozisaun no nivel pesoal autorizadu ida agora ne'e, enkuantu kontinua halo daudaun reduasaun graduál ba numeru polisia ne'ebé temi iha leten (haree paragrafu 61). Rekomendasaun ne'e tuir diskusaun ne'ebé Misaun halo ho Governu kona-ba tranzisaun. Polisia UNMIT nia mandatu devia tau iha konsiderasaun mudansa iha ninia knaar no funsaun nia natureza hafoin faze rekonstituisaun polisia nasional nian hahú (haree paragrafu 18, 23 no 59).

64. Órgaun jestaun eleitoral nasional sira mak sei organiza eleisaun prezidensial no parlamentar ne'ebé atu hala'o iha primeira metade 2012. Maibe, bainhira hein rekomendasaun hosi misaun avaliasaun eleitoral, ne'ebé atu hala'o (haree paragrafu 12), tuir pedidu hosi Governu, iha probabilidade katak Nasoins Unidas sei fó apoiu tékniku no lojistik.

65. Ekonomia Timor-Leste hetan ona rekuperasaun notavel hahú hosi krizi 2006 to'o ohin. Iha tinan haat liu ba ne'e, kreximentu alkansa kuaze díjitu rua, hamutuk ho redusaun iha nivel kiak nian no melhora iha indikador dezvoltamentu umanu. Ho benefisiu ne'ebé mai hosi reseita mina-rai nian, montante orsamentu Estadu ba 2011 sa'e dala haat kompara ho orsamentu Estadu ba 2006. Aleinde atu mantein kreximentu boot ne'e nia ritmu, dezafiu ne'ebé hasoru agora mak atu hetan kreximentu inkluzivu no sustentavel, liu hosi promosaun ba área rural, setor privadu no kriasaun empregu, liuliu empregu ba joven sira.

66. Énfaze boot ne'ebé tau ba dezvoltamentu infra-estrutura, hanesan parte projetu Planu Dezvoltamentu Estratéjiku Nasionál nian no proposta orsamental Estadu nian ba 2011, ezije la'ós de'it aumentu kapasidade ezeekusaun maibe ezije mos implementasaun efikas ba lei, ba mekanizmu no instituisaun sira hodi garante transperensia no responsabilizasaun. Biar importante kria instrumentu atu investiga kazu maladministrasaun no korrupsaun sira, importante mos fó atensaun boot atu prevene ativamente prátika hirak ne'e, hanesan Parlamentu Nasionál, Governu no sociedade sivil rekoñese ona. Aleinde ne'e, importante mos atu haka'as an nafatin hodi hamenus disparidade entre área rural no área urbana, fó apoiu ba grupu vulneravel sira no regula título ba rai no propriedade.

67. Importante halo nafatin esforsu iha nivel hotu-hotu iha sociedade sivil nia laran hodi kombat impunidad no reforsa públiku nia laran-metin ba sistema justisa, inklui kazu hirak ne'ebé Komisaun Espesial Inkéritu identifika ona. Se la halo ne'e, bele kompromete progresu notavel ne'ebé hetan ona to'o ohin iha nivel dezvoltamentu instituisaun demokrátika sira no estado de direito, ne'ebé bele loke dalan ba *empecilhos* (ka spoilers) no bele sees atensaun hosi esforsu kontinuu atu promove nasaun ne'e nia dezvoltamentu sosial no ekonómiku ba tempu naruk.

68. Atu ramata, ha'u hakarak fó obrigadu ba ha'u-nia Representante Espesial, Ameerah Haq, tanba ninia lideransa, no mos ba pesoal UNMIT tomak no ekipa Nasoins Unidas nian iha nasaun ne'e, tanba esforsu kontinuu ne'ebé sira halo hodi fó apoiu ba povu Timor-Leste atu lori dame, estabilidade no dezvoltamentu ba

oin. Ha'u hakarak mós agradese forsa seguransa internasionál tanba apoiu kontínuu ne'ebé sira fó ba UNMIT, inklui apoiu ne'ebé sira fó atu mantein estabilidade iha Timor-Leste.